

## चुनाऽ ग्रां सुन्दरी दा

□ डॉ. सत्यपाल श्रीवत्स

जून महीने दे पूर्ण तेजस्वी भगवान् सूर्य ने जिसलै संजां बेल्लै अपनियें तेज किरणें गी समेटदे होई धारें उप्पर पुज्जियै छप्प-छपूनी खेढनी शुरू कीती तां रामपुर ग्रां दे किश गभरू ते किश अधकड़े ते स्याने-बजुर्ग अपनी रोजाना आदत दे मताबक ग्रां दे बड्डे तलाऽ दे कंठे पर बोहड़ी, अम्बें, बड़े ते ढल्लें दे बूहटें दी सांझी-ठंडी छायां हेठ आइयै अपनियें-अपनियें चौकड़ियें च बंडोइयै बाँहदे न। किश चौकड़ियां ताशें दियें सीप, तुर्फ ते भाबो बगैरा खेडें च रुझी जंदियां न ते किश गप्प-शप्प लाने दा गै मजा लैन लगी पेंदियां न। दूरे पाससै किश अधकड़ ते बजुर्ग बारी-बारी गुड़गुडुएं दे कश लाई-लाई कदैँ हास्से मखौल ते इक दूए गी चांधियां लाने च ते कदैँ-कदैँ गम्भीर गल्लें च रुझन लगी पौंदे न। उं'दियें गंभीर गल्लें च जमाने दी तेजी कनै बदलदी रफतारा दे कारण साढी सभ्यता ते संस्कृति उप्पर होने आहले सम्भावित खतरें दी चिन्ता बी ही। पर, उर्थें गै इक पासै बैठी दी जवान्नी दे नशे च चूर गभरूँ दी इक टोली होने आहलियें नमियें तब्दीलियें गी बरदान समझियै उससै संदर्भ च गल्ल कर करदी ही। सबै गभरू बारी-बारी नमियें तब्दीलियें बारे च अपने-अपने ढंग कनै ब्यान बाजियां करा करदे हे। इनै च उतावले सभाऽ आहले नानकू ने इक नमां शोहशा छोड़दे होई आखना शुरू कीता-- "अज्ज-कल कोई दिन खाल्ली नेई जंदा जिस दिन दुनियां भर दे कुसै नां कुसै शैहरे च सुंदरी चुनाऽ दे अयोजन दी खबर नेई सुनोचदी होऐ। क्या टी.वी. ते क्या अखबारां सब जगह इ'नें चुनाएं दियां खबरां गै छाई दियां होंदियां न। कुतै नगर सुन्दरी दे चुनाऽ होआ करदे न कुतै न्यूयार्क सुन्दरी चुनोआ करदी ऐ ते कुतै दिल्ली जा मुंबई सुंदरी ते कुतै चाईना बगैरा देसैं दियें सुंदरियें दे चुनने दियां त्यारियां होआ करदियां न ते कुसै बड्डे शैहर च चुनने दा संसार ब्यापी आयोजन कीता जा करदा ऐ। कोई टी.वी. चैनल खाल्ली नेई ते नां कोई अखबार ऐसी होग जिस बिच इ'नें चुनाएं दी खबर नेई छपी दी होग। पही कुसै दिन खबर मिलदी ऐ जे विश्व सुंदरी दे चुनाऽ आस्तै यूरोप दे कुसै शैहरै च केइयें देसैं थमां सुंदरियां किट्टियां होइयै अपनी अर्धनग्न अवस्था च पकिंबद्ध होइयै बड़े उतावलेपन कनै अपनी-अपनी बारी दी इन्तजार च न जे कुसलै चुनाऽ दे प्रबन्धक जां अधिकारी उसदे शरीर दी परख-पड़ताल ते नाप-तोल करै जेकर भाग साथ देऐ तां ओह विश्व सुंदरी चुनोई सकने च कामयाव होऐ।"

किश बरें थमां साढ़े देसै दी राजधानी दिल्ली ते फिल्म-नगरी मुंबई, चेन्नई, हैदराबाद, बंगलोर, चण्डीगढ़ ते कलकत्ता बगैरा बड़ै शैहरें च इ'नें चुनाएं दा नेहा दौर होआ ऐ जिसदी ब्हाऽ अमृतसर, जलन्धर ते जम्मू जनेह दूए दर्जे दे शैहरें च बी पुज्जी गई ऐ। बड़ी चंगी ते खुशी आहली गल्ल एह जे साढ़ी रियासती च बी एह नमां 'अन्तर राश्ट्री' रवाज पुज्जी गेआ ऐ। इसदे माध्यम कन्नै सुन्दरी परिवार दे सदस्य शैहरें तक गै सीमत न इस लेई हल्लें अस ग्राई ते टी.वी. दे पर्दे उप्पर इस पासै झुरकी-झुरकी दिक्खियै लम्मियां सूकां सुट्टी-सुट्टी अपने भागें गी कोसदे रौहने आं ते परमातमा कोला पुच्छनेआं हे प्रभु, जेकर साढ़ियें कुड़ियें कोल कुदरती शलैपा बी एह ते नाज-नखरा बी ते पही उ'नें बचारियें गी सुन्दरी चुनाऽ आस्तै काबल की नेई समझेआ जंदा? क्या इससै लेई जे एह बचारियां ग्राएं च रौहदियां न ? तां पही समझे जे ग्राएं च रौहना गै गुनाह ऐ। ओह बचारियां जरूर गै अपने छलैपे पर अत्थरूँ बगादियां होनियां न। एह सोचने आहली गल्ल ऐ।-- जेकर साढ़े देसै दे विज्ञानियें खोजें थमां प्राप्त उपलब्धियें दे अधार पर सूचना प्रौद्योगिकी ते शून्य दे रहस्यें गी जानने दे बारे च अनुसन्धान करियै दुनिया भर दे लोकें गी अपनी बुद्धी दा चमत्कार दस्सी दिता ऐ तां क्या सुंदरी चुनाएं च हिस्सा लेइयै ते मकाबला करियै साढ़ियां कुड़ियां बी दूए देसैं दियें सुंदरियें गी र्हाईयै विश्वसुंदरियें दा ताज धारण नेई करा करदियां न? सुभिता सेन ते लारा दत्ता बगैरा ने एह सम्मान केई ब'रे पैहलें हासल करी ले हे। पर, इस खेत्तर च मकाबला करने आहलियां सिर्फ बड़ै शैहरें दियां सुंदरियां गै गिनतरी च आवा करदियां न। साढ़े ग्राएं दियां सुंदर कुड़ियां टी.वी उप्पर उ'पेी ताजपोशी दिक्खी-दिक्खी स्वाए सूकां सुट्टेने ते मनै च कुढ़ने दे ते परमातमा गी एह लाहमा देने दे जे हे प्रभु, असें गी जनम देने आस्तै तेरे कोल एह पराने दकियानूसी रवाजें आहलें ग्रां गै रेही गेदे हे?"

नानकू अज्ज दे जमाने च सुंदरी चुनाएं दी प्रासंगिकता गी सिद्ध करने आस्तै अपनियां दलीलां देई-देई बस बी नेई हा करा करदा तां जे उत्थें बैठे दे उसदे किश काहले सभाऽ आहले साथी बाह-बाह करियै उछलन लगी पे हे। इनै च उं'दे चा सैतू झट्ट बोल्ली पेआ- "नानकू, तूं दौं सालें थमां दिल्ली च रौहदे होई दुनियां भर च सुंदरियें दे चुनाएं दे बारे च तफसील कन्नै जानकारी असें गी देइयै साढ़ियां ते अक्खीं गै खोहल्ली दित्तियां न। असें ग्राइयें गी दुनियां च औने आहलियें तब्दीलियें दे बारे च कक्ख बी पता नेई। भ्रावो, भाएं साढ़े ग्राएं च बी अज्जकल केइयें लोकें अपने घरें च टी.वी. लुआई लेदे न, पर अस सुंदरी चुनाएं दे बारे च कदें-कदें आई दियें खबरें गी तमाशा जन गै समझियै टाली-टूली दिंदे हे। पर अज्ज भाऽ नानकू, ने जेहड़ी जानकारी दित्ती ऐ उस कन्नै ते साढ़ियां अक्खीं गै खु'ल्ली गेइयां न। "अच्छा नानकू तूं गै दस जेकर अस अपने ग्रां च बी 'ग्रां सुंदरी' दे चुनाऽ दा अयोजन करचै तां भला अस कामयाब होई सकनेआं जां नेई ?"

सैतू दा सुआल सुनदे गै नानकू ने झट हां करदे होई आखना शुरू कीता- "भ्राओ जित्थै चाह उत्थै राह । जेकर अस गब्भरू पक्के इरादे कन्नै उद्दम करचै तां अस "ग्रां सुंदरी" चनाऽ दा अयोजन करने च जरूर कामयाब होई सकनेआं। इस चटाकेदार ते रंगीले कार्यक्रम दा सब्भै



ग्रां आहले जरूर समर्थन करडन। ऐसी मिगी पक्की मेद ऐ। हां, अपने ग्रां दे केइयें चाल्ली सन्नै ते परानी लकीरा पर चलने आहले बुड्डें पर मिगी जरूर शक्क ऐ जे ओह इस अयोजन आस्तै कर्दें बी अपनी सैहमती नेई देन लगे। पर असें गी चाहिदा जे इस अयोजन गी हर हालती च कामयाव बनाचै। जे तुस मेरै कन्नै सैहमत ओ तां दस्सो जे अस कियां ते कर्दू इस नमें रवाज दा अपने ग्रां च अयोजन करचै?"

नानकू दी गल्ल सुनियै चन्द्रराम झट्ट बोल्ली पेआ-“नानकू, अ'ऊं गल्ल करना कोरी, भाएं कोई करै मेरे पर रोह। पैहले दस्सों बिल्लियें दे गल्ल घैंटी कु'न ब'न्नग? इस कट्टरपैथियें दे ग्रां च नमें जमाने दे इस बेशर्म जनेह तमाशे दा अयोजन करने थमां पैहलैं सौ बारी सोची लैओ ते इस बारे च गल्लै-गल्लै च स्याने बजुर्गें दे कन्नैं बिच्चैं बी कड्डी लैना चाहिदा। भाई साहब, स्कीमां सब दस्सी सकदे न, पर उ'नें गी व्यवहारक रूप देना इन्ना सखल्ला नेई होंदा। असल च हर कम्म दे व्यवहारक पक्ख दे बारै च सोचने पर गै पता चलदा ऐ जे सत्तैं-बीहें सौ कियां होंदा ऐ? एह कम्म इन्ना सखल्ला नेई ऐ जिन्नी अस इस बारे चर्चा करै करने आं। नानकू करदा लंदन, अमरीका, दिल्ली, मुंबई, बगैरा शैहरें ते थाहरें दियां गल्लां। उत्थों दे लोक नमियें तब्दीलियें कन्नै अपने बचारें गी बी ते रीति-रवाजें गी बी बदली लैंदे न, पर साढ़े आस्तै इस बारे च सोचना बी सखल्ला-नेई ऐ की जे अस ग्रांई बदकिस्मती कन्नै हल्लैं बड़े गै पिच्छें आं। शैहरे च इक ते मते लोक पढ़े-लिखे दे होंदे न ते दूआ उं'दी सोच बी जमाने दी बदलदी ब्हाऽ दे मताबक होंदी ऐ। एह गल्ल नेई ऐ जे उं'दे च पराने बचारें दे लोक नेई होंदे न, पर की जे उं'दी गिनतरी घट्ट होंदी ऐ इस लेई ओह खीर च मजारटी कन्नै समझोता करी लैंदे न। पर इत्थें ते बड़े कट्टरपैथी लोक बसदे न। उं'दे कन्नै नां कोई बैहस करी सकदा ऐ ते नां गै उ'नेंगी अपने अडियल रवेइये कोला टस ते मस करी सकदा ऐ। इस बास्तै छोड़ो इ'थै नेह कार्यक्रमें दे अयोजन दा इरादा ते करो अपने ग्राएं दी तरक्की-बाढ़े आस्तै कोई चंगा कम्म।

चन्द्ररामें दी दलीलें भरोची राऽ सुनियै उसदा समर्थन करदा होआ हरिचन्द बोल्लेआ-  
-“हां, चन्द्रराम तूं ठीक आक्खा करनां ऐ। साढ़े ग्राएं च अजें नमें जमाने दी ब्हाऽ ने अपना इन्ना असर नेई ऐ कीते दा। इत्थें अजें बी लोकें दा अपनियें परानियें परंपरें कन्नै ते धार्मिक रस्में कन्नै उ'ऐ नेहा लगाऽ ते आस्था ऐ। दिक्खेआ जा तां अपनी संस्कृति ते सभ्यता दे स्हेई मैहने च अस गै रखोआले आं। असें गै अजें बी इंदी सांभ-सम्हाल कीती दी ऐ। मुंबई, दिल्ली बगैरा गै नेई हून ते साढ़े जम्मू गी बी बदेशी सभ्यता ने अपने कब्जै च चंगी चाल्ली लेई लेदा ऐ। असेंगी इस गल्ला दा फखर ऐ जे साढ़े ग्राएं च बी बेशक्क किश परसैंट बदेशी सभ्यता रूपी प्रदूशन अपना असर करन लगी पेदा ऐ, पर अजें बी बड़ा बचाऽ ऐ। इस लेई भ्रावो, छोड़ो इ'थै नेह बाह-ज्हात कार्यक्रमें दे अयोजनें दा ख्याल ते सोचो ग्रां दे नेकें मसलें दे हल्ल तुप्पने दे बारे च।”

“इक गल्ल होर एह जे तुस घर बेठे दे गै ख्याली पलाऽ पकाई जा करदे ओ, जेकर खुदा ना-खास्ता तुस इस कार्यक्रम दा अयोजन करने दी तयारी बी करी लैओ तां बी मिगी



नेई मेद जे तुंदे सादे पर चंगे ते उच्चे घरे दियां शैल कुडियां “सुंदरी चुनाऽ” च हिस्सा लैनै आस्तै अगँ औडन ते जां पही उं दे माता-पिता उं नेंगी इस बारे च अपनी स्वीकृति बी देन।”

हरिचंदे दी गल्ला गी खि'नु आहला लेखा पड़छियै ते पिच्छें सुट्टने आहला लेखा नकारदे होई ब्रह्मू तमसियै आखन लगा--“अस बी दिक्खी लैगे कु'न जुरत करदा ऐ साढ़े कार्यक्रमें च विपन पाने दी। लतां त्रोड़ी देगे उसदियां। रेही गल्ल सुंदर कुडियें गी चुनाऽ दे स्टेज उप्पर लेई औने दी, सो असेंगी औंदा ऐ ओह तरीका बी। अस बनागे पैहलें शैल-सन्हाकड़ी कुडियें दी सूची पही कुसै ऐतवार आहले दिन कुडियें दे दस्मीं दे स्कूलै दी ग्राऊंड च इक स्टेज बनाइयै, फोटोग्राफरें ते टी.वी. चैनलें दे नमायदे गी न्योता देइयै सद्ने दे बाद स्कूलै च कुसै सरकारी कार्यक्रमें दा ब्हान्ना बनाइयै ते कुडियें गी सद्दियै उं नेंगी मुट्टी रकमें दा लालच देइयै चुनाऽ च हिस्सा लैनै आस्तै मनाई लैगे।”

ब्रह्मू दी सलाह सुनियै उत्थें बैठे दे रोहलू, भीमू, मुन्शीसिंह बगैरा सारे “बाह बाह” करदे होई आखन लगे-- “हां हां जवानों, करो त्त्यारी इस नमें किसमें दे चुनाऽ दी। अस थुहाड़े कन्नै आं। असेंगी जेहड़ा कम्म बी सोंपगे, अस पिच्छें नेई हटगे। जे कुसै ने इस प्रोगामै च अड़चन पाने दी कोशश कीती तां अस नुआहड़े हड्ड बी भन्नी देगे।”

गभरूएं दी इस गिहड़ धमकी दी भिनक जिसलै किश दूर बैठे दे चाचू किरपाराम भजू ते लच्छो बगैरा दे कन्नै च पेई तां ओह चकने होइयै इक-दुए गी सारतीं करांदे होई आखन लगे --“एह छोकरू केह “ग्रां सुंदरी चुनाऽ” आक्खी-आक्खी रौला पा करदे न। कुतै साढ़े ग्रां च बी कोई नमीं कुबुद्ध ते नेई शुरू करन लगे न?” इनै च किरपाराम आखन लगा-- “तुस अपनियें गप्पें च रुज्जे दे हे, इस लेई उद्धर पूरा ध्यान नेई हा देन होऐ दा, पर में ते उं दी सारी स्कीमां सुना करदा हा। तुस चुप-चवीते इत्थै गै बैठे र'वो। में लैन्ना खबर इ'नें कम्फनुएं दी।” इन्ना आक्खियै किरपाराम ने अपना बांसी सोट्टा सधेरेआ ते तौला-तौला उं दे कोल जाई पुज्जा ते पुजदे गै बिंद झिड़कियै पुच्छन लगा-- “ओह बै जवानो, केह नमां सरिस्ता शुरू करा करदे ओ इस ग्रां च? त्रट्टनुओ, “सुंदरी चुनाऽ” आहली कंजरखेढ इस ग्रां च बी शुरू करन लगेओ? मूखों तुसें गी अपने ग्राएं दे बिजली पानी, सिडकें रस्तें ते बेरूजगारी बगैरा केई मसले नजरी निं औंदे? इत्थें सुंदरियें दे चुनाएं दे अयोजन करियै जां करोआइयै तुसें एह सारे मसले हल्ल करी लैनै न? जेकर तुस अमरीका, लंडन, दिल्ली, मद्रास बंबई ते जम्मू बगैरा शहरै च चलने ते चलाए जाने आहलें इ'नें कंजर तमाशें दी नकल करियै इस ग्रां च बी उ'ऐ किश करना चांहदे ओ तां मिगी हूनै-हूनै दस्सो जे इस कन्नै तुसें अपने ग्रां दी केह भलाई करने दी सोची दी ऐ? दूई गल्ल एह जे क्या कोई बा-इज्जत परोआर अपनियां कुडियां इस बशर्म कम्मै आस्तै भेजडन? जे तुसें चोरी-छप्पै इस कनीती कम्मै दी हिम्मत करी बी लेई तां होर ते भाएं पिच्छोआं अगँ औडन पैहलै मियें तुसें गी त्रढ़ी टकाना ऐ। दस्सो जे एह हरकत करने दी हिम्मत तुसें जरूर करनी ऐ। बशर्मो, बिंद करियै ते दिक्खो। पही दिक्खो मेरा तमाशा। मेरा नांऽ बी किरपाराम ऐ।”



चाचू किरपारामे दी उस झिड़का गी ऐहमें गै लेंदे होई नानकू झट्ट बोल्ली पेआ-- “चाचू इधै ते तुसें परानी लकीरें उप्पर चलने आहलें दी सोच ऐ, जेहड़ी साढ़े ग्राएं गी अगगै नेई बधन दिंदी। जेकर अज्जकल दुनिया भर दे देसैं च ते साढ़े भारत दे लगभग सब्भनी बड्डे-निकके शैहरें च “सुंदरी चुनाए” दा आम रवाज होई गेदा ऐ तां अस ग्राई बी जेकर अपने ग्राएं च इसदा प्रचलन शुरू करी देचै तां केहड़ा अंबर फटी जाना ऐ। चाचू छोडो हून पराने ख्यालें दे बचार गी ते दुनिया दी ब्हाऊ दा रुक्ख पनछानने दी कोशश करो ते उसदे मुताबक चलो। जेकर तुस इसदे बावजूद परानी लकीरा दे फकीर गै बने रौहना चांहदे ओ तां कम से कम असेंगी ते अपने कदम अगगै बधन देओ। मेहरबानी करियै असेंगी नेई रोको। चाचू कम से कम इक चुनाऽ ते इस ग्रां च करोआन देओ। शैहरियें दे “सुंदरी चुनाऽ” ते साढ़े “सुंदरी चुनाऽ” च मता फर्क होना ऐ चाचू। असें नां ते उ नें सुंदरियें आहला लेखा अपने ग्रां दियें सुंदरियें गी अर्ध-नग्न होइयै जां स्वीमिंग सूट पाइयै रैम्प उप्पर कैटवाक करन देनी ऐ ते नां गै कुसै सुंदरी चुनाएं दे माहिर कोला उंदे शरीरे दी नाप-तोल करन देने न असें ते उ नेंगी सिर्फ डोगरा ड्रेस च त्यार करियै गै स्टेज उप्पर लेआना ऐ। हां, इन्ना जरूर ऐ जेहड़ी कुड़ी ग्रां सुंदरी चुनी जाग उसदी ताज पोशी होई जाने दे कन्नै-कन्नै कैमरा मैन, प्रैस ते वी.डी.ओ. फिल्मां करने आहलें अपना-अपना कम्म ते करना गै ऐ ते कन्नै उसलै जेहड़ा बी कोई तम्हातड मुख परौहना होग उन्न अपने बचार बी प्रगट करने गै न। जेकर मुख परौहना कोई एम.एल.ए. जां मिनिस्टर होआ तां तुंदे जनेह दे ते साह गै फुल्ली जाने न।”

नानकू दी ओह दिलेराना गल्ल सुनियै उत्थें बैठे दे सारे गभरू ते जवान-- “बाह-बाह” करन लगी पे हे। पर चाचू किरपारामें दा गुस्सा बेकाबू होई गेआ हा। उन्न आल-माल कीते बगैरा नानकू दी पिट्ठी उप्पर अपने सोटे कन्नै जिसलै ‘ठल्ल’ दी बाजा कन्नै देई मारी तां उसदी चीख निकली गई ही। उसदे कन्नै गै चाचू ने आखना शुरू करी दिता हा--“ओह ग्रां जुआडुआ, तूं मरी जाएं। बशर्मा, कप्फनुआं, तूं दिल्ली दो साल केह कट्टी आया ऐं जे तुगी ते पर गै लगगी गे न। तुगी बड्डें दी इज्जतू दा ख्याल गै नेई रेहदा।”

एह आखने दे कन्नै-कन्नै गै जिसलै उन्न दूआ बार करने आस्तै अपना सोटा चुक्केआ नानकू उछलियै--“ओह मारुड़ेआ” करलांदा होआ मुट्ठी बट्टियै उत्थुआं दा नस्सन लगी पेआ हा ते उसदे पिच्छें-पिच्छें बाकी गभरू बी नस्सन लगी पे हे ते चाचू किरपाराम उत्थें गै उ नेंगी जे मूंह औंदा आकखी जा करदा हा--“ठैहरो, कंजरो, करोआना थुहाड़े कोला “ग्रां सुंदरी दा चुनाऽ”। कप्फनो, ग्रां च बेहतरी आहले कम्म करने ते करोआने आस्तै तुसेंगी मौत औंदी ऐ ते एह कंजरखेढ करने आस्तै तुसेंगी उद्म बी है ते हिम्मत बी करियै दस्सो हां एह कनीत। जां इत्थें में निं रौंहग ते जां तुस। जे तुस फही इधै नेहियें कनीतीं आहले कम्मं दे बारे च गल्लां करदे लब्भे थुआढ़े बिच्चा इक बी मैरै थमां बचन निं लगा।”

